

par Tauben sind gnug für drey hundert Kästlein/ Vnd so in einem Taubhauß fünff tausent Taubenkästlin gemacht seind/ so ist es nicht gnug an einer solchen anzahl. Sie haben auch einander nicht so lieb/ wenn ihrer so wenig in einem Taubhauß seind/ Sondern sie werden trawrig vnnnd sterben darvon.

Wenn ihr wöllet euwer Taubhauß besetzen/ so solt ihr junge Tauben sampt ihrer Mutter vnd dem Käuter auß ihren Taubhäusern/ die noch nicht flücke seind/ nemen/ vnd in ein Käfig setzen/ vnd sie einem fleissigen Taubenknecht befehlen/ der sie mit Wicken vnd Wasser zweymal in einem Tag so lange äße/ biß sie selbst anfangen zu essen vnd zu trincken. Denn also vergessen sie ihrer vöri gen speise/ vnd der alten Tauben/ gewohnen des nechsten Taubhauses/ da man sie hin setzet. Solches thut kein alte Taube/ Denn wenn sie schon in ein new Taubhauß gesetzt/ vnd nur einmal außgelassen wirt/ vnd lufft empfähet/ so flucht sie widerumb an jr alt Ort/ ob es schon sehr weit vnd ferrne darvon ist.

Die Escherfarben oder die grawen/ vnd die Braunen/ oder die schwarzen Tauben/ seind die aller besten/ vnd fruchtbarsten. Die mit fahlechten oder behenckten füßen/ vnnnd die mit dem Kampff/ seind die verwehnesten vnd heimlichstien. Die Schäckechten vnd die mit den kappen seind gleicher art. Die Goldgelbe omb den Hals seind/ rote Augen vnd rote Füß haben/ seind die waerkersten vnd fruchtbarsten. Die weissen Tauben seind zwar gut auffzubringen vnd auffzuziehen/ aber ihnen seind die Geier vnd andere räubische Vögel sehr gefehr. Die gelben vnd roten seind die vnfruchtbarsten.

Wenn du wilt die Tauben zam machen/ so gebe jnen bißweilen Honig/ bißweilen Wicken oder Rummel zu essen/ denn solches alles macht die Tauben bleiben/ vnd nicht hinweg fligen. Oder gebe das jnen außgereutete von Weizen.

Fünffsehen Tage soltu sie anfangs innhalten/ vnd nicht lassen außfligen. In dem aber ein Garn für die Fenster spannen/ damit sie gleichwol lufft vnd liecht haben/ vnnnd nicht darvon fligen können. Nach fünffsehen Tagen/ solt du das Garn hinweg thun/ vnd sie gegen Abend im Regenwetter/ wenn es tuncel vnd näblecht ist/ außlassen/ den also fligen sie nicht zu weit/ vnd schweiffen nicht lang omb/ Sondern kommen gleich wider. Man thue was man wölle/ so mercken sie doch gleich ihre ställe/ fehlen desselbigen nicht/ vnnnd weichen schwerlich darvon/ sondern kommen stäts wider.

Vnd so du roten Ofeneymen klein gestossen/ Rummel/ Honig vnd Salzbrüe mit einander vermische/ ein klosen wie Brot darauß machest/ vnd im Ofen backen läßst/ darnach für die Fenster legest/ daß sie darvon essen/ so bleiben sie kein mal außsen/ Sondern kommen wider. Sie seind also sehr auff solche speiß begierig/ daß sie auch mit dem geset mach vnd geruch/ den sie darvon behalten/ auch noch andere vnd frembde mit sich heim führen/ vnd kein mal darvon fligen.

Die Tauben kansu auch machen bleiben/ daß sie nicht darvon fligen/ sondern allwegen zu Hauß wider kommen/ so du ihnen Linsen in Honig erweicht/ oder in süßem gesottenem Wein gesocht zu essen gibst. Oder man neme dürre Feigen/ mit ein wenig Honigs/ knette sie vnter düre gesotten Gerstenmehl/ vnd gebts den Tauben zu essen. Etliche sagen/ daß die Tauben nicht hinweg fligen/ wenn man ein Fledermaußkopff oben auff das Taubhauß außhendet. Oder einen Zweig von wilden Raben abschneidet: Oder daß man die Thür/ die Fenster vnd alle Ecken in dem Taubhauß mit Balsamöle bestreicht.

Damit sie aber andere frembde Tauben mit sich bringen/ soltu den deinen vorhin/ ehe denn sie außfligen/ die Flügel mit Balsamöle bestreichen/ oder du magst Schafsmaul oder Agni Castus samen nemen/ in Wein weichen lassen/ darnach Wicken mit solchem Wein besprengen/ vnd den Tauben fürs chütten/ vnd zu essen geben/ wenn sie allbereit außfligen wölten/ Denn so bald die frembden den geruch empfinden/ so kommen sie alle mit den heimischen in das Taubhauß.

Du solt auch das Taubhauß zum offternmal mit Wecholder/ Rosmarin/ oder bißweilen mit gutem Wehrauch beräuchern lassen/ denn solcher geruch behelt die Tauben/ vnd haben das Taubhauß darvon lieb.

Wenn man aber vermerckt/ daß die Tauben wölten anfahen zu legen/ so muß man sie etwas offters außlassen/ vnd ihnen alle morgen vnd abends etliche Körnlin nicht weit von der Schwere/ da keine Misthauffen seind/ fürs werffen/ ihre Trinckgeschirr/ vnd darauß sie sich baden/ offt reinigen. Also bringen sie nicht allein viel frembder Tauben mit sich denn sonst: Sondern ewere zwanzig par machen auch zwey mal oder drey mal so viel jungen innerhalb vierzig tagen.

Die allgemeinen Tauben brüten drey mal/ die besten aber viermal im Jar. Es bedarff keiner besonderer wartung bey den Tauben/ denn daß man das Taubhauß rein vnd sauber behalte. Darumb sol der Taubenknecht/ auff das wenigst einmal in einer Wochen/ des morgens früe/ wenn die Tauben auß vnd in das Feld geflogen seind (denn die Tauben halten sich gemeinlich vmb den Mittag